

Վանայ լճի Կտուց կղզու մէջ գտնուում էր Կարապետ անապատը, որի հիմնադրումը եկեղեցական ականգութիւնը կապուած է Սրբ. Գրիգոր Լուսաւորչի անուան հետ: Սակայն վանքի գործունէութեանը վերաբերող յստակ տուեալները պատկանում են ժ.Ն. դարին: Մինչ այդ միայն մէկ վկայութիւն ունենք Կտուց անապատի եւ գործող գրչութեան կենտրոնի վերաբերեալ: Սա ձեռագրական մի փոքրիկ միաւոր է, ժԱ. դարում գրուած ճառերնորի մի մագաղաթեայ թերթ գրուած մանր երկաթագրով, իսկ ստորին լուսանցքում պարունակում է յիշատակութիւն Կտուցի մասին՝ գրուած գրչի ձեռքով. «Կտուց է»¹: Այս պատառիկը այժմ պահուած է Վենետիկի Մխիթարեան միաբանութեան ձեռագրատանը: Անապատին վերաբերող մնացած տեղեկութիւնները պատկանում են ժ.Ն. դարին: Հնագոյն ձեռագիրը, որի մասին տեղեկութիւն ունենք, մի Աւետարան է՝ գրուած 1414 թ. Յովսէփ քահանայի ձեռքով. «Արդ գրեցաւ սուրբ Աւետարանս ի թուին Հայոց ՊԿԳ (1414) ի դրան Սուրբ Խաչին եւ Սուրբ Կարապետին եւ Սուրբ Գրիգոր Լուսաւորչին... որ կոչի Կտուց: ...ի Հայրապետութեան տեառն Հայոց կաթողիկոսի տէր Դաւթի՝ Սուրբ Խաչի Աղթամարայ առաջնորդի, եւ առաջնորդութեան սուրբ ուխտին Սուրբ Կարապետին... արհիպիսկոպոսին Մխիթարա...: Արդ գրեցաւ սուրբ Աւետարանս ի դառն եւ ի նեղ ժամանակիս, որ հարկապահանջու-

թեամբ ազգս տապալի(°)/// զի կարի ձանձրացեալ եմք յանաւրինաց բռնութենէ. ի քրթէ, ի թաթարէ եւ յայլ ամենայն»²: Ձեռագիրը, ցաւօք, կորած է, սակայն նրա յիշատակարանը մեզ ականգում է տեղեկութիւններ Կտուց մենաստանի մասին, այդ թուում՝ Սուրբ Ուխտի անունը՝ Սուրբ Կարապետ, առաջնորդը՝ Մխիթար արքեպիսկոպոս, Աղթամարի Դաւթ Գ. կաթողիկոսը (1393-1433), նաեւ՝ յիշուած են վանքի եկեղեցիների կամ խորանների անունները՝ Սուրբ Խաչ, Սուրբ Կարապետ, Սուրբ Գրիգոր Լուսաւորչի:

Վկայութիւն ունենք, որ 1415 թ. Մերուկ գրիչը Կտուց անապատում մի ժողովածոյ է գրել. սակայն այն մեզ չի հասել³:

Կտուց անապատը որպէս գրչութեան վայր յիշատակող ժ.Ն. դարի միւս ձեռագրերը պատկանում են երկրորդ դարակէսին: Դրանք ստեղծել են Խաչատուր, Յովհաննէս, Մինաս եւ Բարսեղ գրիչները, Մինաս եւ Կարապետ ծաղկողները:

Կտուց անապատի միաբաններից է Խաչատուր արեղան: Նրանից մեզ յայտնի է 6 ձեռագիր: Վաղագոյնը գրուել է 1456 թ., վերջինը՝ 1482 թ.: Գրչի ձեռագրերի յիշատակարանները, թէեւ սակաւիկ, բայց մեզ հաղորդում են նրա մասին կենսագրական տուեալներ: Խաչատուր արեղայի ծնողները Յովանէս ու Ասըլմելիքն են, եղբայրը՝ Եւատչէն եւս Կտուց անապատի

1 Մայր Յուցակ հայերէն ձեռագրաց Մատենադարանին Մխիթարեանց ի վեցետիկ (այսուհետ՝ վեցետիկ), հտ. Բ, կազմ. Բ. Սարգիսեան. Գ. Սարգսեան, Հասարակական գիտնական, Ժաժ, ձեռ. թիւ 749, հմր. 306, էջ 1175-1180:

2 Հայերէն ձեռագրերի յիշատակարաններ, ժ.Ն. դար, հտ. Ա, կազմ. Լ. Խաչիկեան, Երեւան, 1955, էջ 165-166. Համազասպ Ոսկեան, Վասպուրական-Վանի վանքերը, Ա. մաս, Վիեննա, 1940, էջ 58:
3 Ղ. Փիրղալեմեան, Նոտարք Հայոց, Կ. Պոլիս, էջ 47:

միաբան է: Խաչատուրը նշում է, որ նա է իրենց հայրագլուխը «զհայրն իմ՝ զՅովանէս եւ զմայրն իմ՝ զԱսըլ-մելիքն, եւ զեղբայրքն իմ՝ զԵւատչէն, որ է հայրագլուխ մեր»: Նրա միւս եղբայրը Յովհաննէս քահանայ Արծկեցին է: Գրչի ուսուցիչը՝ Գրիգոր վարդապետ Թաբեկեցն է. նրան է պարտական Խաչատուրը գրչութեան արուեստին այդքան լաւ տիրապետելու համար: Նրա հարազատներից է նաեւ Ստեփաննոս քահանան, ով օգնում էր յատկապէս թուղթ կոկիլով (1456 եւ 1481 թթ. ձեռագրերի համար): Գրիչը գրում է. «Եւ զՍտեփանոս քահանայն՝ հարազատ հոգոյ իմոյ, որ բազում աշխատեցաւ ի կոկիլ թղթիս: Եւ զԳրիգոր վարդապետ մեր զԹաբեկեցն, որ բազում հոգ տարաւ ի վերայ մեր եւ զսակաւ գիծս մեզ ուսոյց...»: Յատկանշական է նաեւ, որ Խաչատուրի գրչագրերը նկարազարդել է Մինաս ծաղկողը: Նրան Խաչատուրը նշել է իր՝ 1456 թ., 1462 թ. եւ 1482 թ. ձեռագրերում՝ համեմատելով Բերսէլիէլի՝ Հին Ուխտի տապանակի նկարողի հետ. «Եւ դարձեալ աղաչեմ յիշել յաղութս ձեր զտէր Մինաս քաջ նկարաւորն, որ յար եւ նման է Բերսէլիէլի՝ հոգիւնկալ առաջին նկարողին տապանակին, եւ է յաշակերտաց սուրբ վարդապետացն՝ Թումային եւ Մկրտիչ Աւրեկեցնց վարդապետին...»:

Ինչպէս վերը նշեցինք, գրչի վաղագոյն ձեռագիրը 1456 թ. Աւետարանն է (Փարիզ, 18)⁴, որի ծաղկողը՝ Մինասն է. այն գրուել է Յովհաննէս տանուտէրի պատուէրով: Որպէս գրչութեան վարպետ՝ Խաչատուրը կարեւորել է գաղափար օրինակի լաւ լինելը եւ ձեռքի տակ ունեցել միաժամանակ երկու գրչագիր. «Յերկու ճշմարիտ աւրինակաւ գրեցաւ սա՝ ի թուա-

կանիս Հայոց Զե (1456), ի վանքս, որ կոչի Կտուց, ընդ հովանեաւ Սուրբ Կարապետիս, եւ Սուրբ Աստուածածնիս, եւ Սուրբ Խաչիս, եւ Սուրբ Գրիգոր Լուսաւորչիս, եւ Սրբոց Հոսիփսիմեանցս, եւ այլ սրբոց, որ աստ կան հաւաքեալ, ձեռամբ մեղսաներկ եւ սառուցեալ Խաչատուրու, ի խնդրոյ Յովհաննէս բարեմիտ տանուտէրին...»:

1462 թ. Խաչատուր արեղան ընդօրինակում է Յայսմաւուրք (Մատենադարան (այսուհետեւ՝ ՄՄ), ձեռ. թիւ 4883) Ստեփաննոս եւ Խաչատուր արեղաների խնդրանքով: Նա նշում է իր եղբոր՝ Յովհաննէս քահանայ Արծկեցու անունը, «զի նա եւս բազում աշխատեցաւ ի գիրքս», եւ ծաղկողին՝ Մինաս կրօնաւորին⁵: Ձեռագրի ընդարձակ յիշատակարանը պարունակում է իր ժամանակի պատմական կարեւոր տուեալներ: Նախ՝ պատմում է 1462 թ. Կտուց անապատի վերանորոգութեան մասին՝ կազմակերպուած Կտուցի առաջնորդ Գրիգոր եպիսկոպոսի եւ միաբան Ստեփաննոս վարդապետի կողմից, նշում են վանքի առաջնորդի ու կրօնաւորների անունները. «Աւարտեցաւ քրիստոսահիմն եւ քաջ նահատակաց եւ մարտիրոսաց հոգիաբուխ սուրբ տառս ի յամի ԶԺԱ (1462), ի վանքս որ կոչի Կտուց, ընդ հովանեաւ Սուրբ Խաչիս եւ սուրբ Նշխարաց ճառագայթի ճըրագ ճշմարտութեան Սուրբ Կարապետիս, որ յայսմ ամի նորոգեցաւ մոլայիւ, ձեռամբ Ստեփանոս վարդապետի, որ մականունն Յայաք, եւ Գրիգոր եպիսկոպոսի, որ էր առաջնորդ սուրբ ուխտիս եւ այլ միեղէն եղբարցս, որ չարչարեցան եւ աշխատեցան ի սուրբ եկեղեցիս՝ Խաչատուր գծողս, եւ Յակոբ կրօնաւորն, եւ Սարգիս կրօնաւորն, եւ Ստեփանոս կրօնաւորն, եւ Յովանէս կրօնաւորն, եւ Մկրտիչ

4 Ձեռագիրն այժմ գտնուում է Փարիզի Ազգային գրադարանի հայերէն ձեռագրերի ֆախաբաժնում, տե՛ս R. Kevorkian, A. Ter-Stepanian, *Manuscripts arméniens de la Bibliothèque nationale de France*, Paris, 1998, 26-30, # 18:

5 Մինաս կրօնաւորը Վասպուրականում մեծ հռչակ վայելած մանրանկարիչներից մէկն է եղել, գործել է ինչպէս Կտուց անապատում, այնպէս էլ Վանում, Աղթամարում եւ Վասպուրականի այլ գրչութեան կենտրոններում:

կրօնաւորն, եւ Յովանէս կրօնաւորն, եւ Կարապետ կրօնաւորն, եւ Ներսէս կրօնաւորն, եւ Յովնանէս ճգնաւորն, եւ Կարապետ կրօնաւորն, եւ Աստուածատուր կրօնաւորն, եւ Կարապետ կրօնաւորն, եւ Մխիթար կրօնաւորն, եւ Խաչատուր կրօնաւորն եւ այլ ամենայն աշխատաւորք...»⁶: Գրիչը շարունակում է պատմել, որ ժամանակի Աղթամարի կաթողիկոսը՝ տէր Զաքարիան, տիրեց երկու աթոռների՝ Էջմիածնի եւ Աղթամարի, նաեւ Սբ. Էջմիածնից սբ. Գրիգոր Լուսաւորչի աջը տեղափոխեց Աղթամարի Սուրբ Խաչ եկեղեցին. «Եւ ամենայն ոք ակրհնէր զարարիչն Աստուած եւ զտէր Զաքարիա կաթողիկոսն, որ արժանացոյց տեսելեան սուրբ աջոյն Լուսաւորչին...»: Յայտնի է, որ 1441 թ. Հայոց կաթողիկոսական աթոռը Սսից տեղափոխուած է Էջմիածին, եւ Ամենայն Հայոց նորընտիր կաթողիկոս Կիրակոս Վիրապեցին տեղափոխուած է նաեւ սբ. Գրիգոր Լուսաւորչի աջը: Աղթամարի կաթողիկոս տէր Զաքարիան ստիպուած է լինում 1461 թ. վերադառնալ Աղթամարի իր հետ թաքուն կերպով բերելով նաեւ Սբ. Աջը: Բնականաբար, վասպուրականցիներն այս իրողութիւնը մեծ ոգեւորուածութեամբ են ընդունում, ինչն էլ արտայայտուած է ոչ միայն վերոնշեալ, այլ՝ Աղթամարում ընդօրինակուած այլ ձեռագրերի յիշատակարաններում⁷:

Խաչատուր գրչի ընդօրինակած միւս չորս մատենները Աւետարաններ են: Սրանցից առաջինը գրուել է 1463 թ. (ՄՄ

6 Մաշտոցի անուան Մատենադարան (այսուհետև՝ ՄՄ), ձեռ. թիւ 4883 (թերթ՝ 615, թուղթ, 32x21, երկսիւն, բոլորգիր): Հայերէն ձեռագրերի յիշատակարաններ, ԺԵ դար, հտ. Բ, կազմ.՝ Լ. Խաչիկեան, Երեւան, 1958, էջ 180-184:
7 Տարիներ անց՝ 1477 թ., Սբ. Աջը կրկին վերադարձուած է Էջմիածին, սակայն նորից թաքուն կերպով: Պատմական այս իրողութեան մասին անելի մանրակրկիտ տե՛ս Մաղաքիա արք. Օրմանեան, Ազգայնաստու, հտ. Բ, Սբ. Էջմիածին, 2001, յօդ. 1494-1497, 1511:

6356), Հալիֆէ տանուտէրի խնդրանքով: Երկրորդ Աւետարանը գրուած է 1475 թ. (կորած), ստացողներն են «սրբասէր եւ բարեմիտ խօջայն Էդրլչէն եւ մայրն իւր Գաւնգուլլէն»⁸: Երրորդ՝ 1481 թ. գրուած Աւետարանի (կորած) ստացողն է Վարդան արեղան. «Ի խնդրոյ սրբասէր եւ մաքրամիտ արեղային Վարդանայ, որ զեկեղեցոյ զլուխն սուաղեաց եւ զարտն ի Շատուան երար ոխֆ եկեղեցոյն, թուականիս մերում ԶԼ (1481)...»⁹: Խաչատուր արեղայից մեզ հասած վերջին Աւետարանը պատկանում է 1482 թուականին (Նոր Զուղա, 497): Սրա ստացողն է խօջա Իդրլչին, ծաղկողը՝ Մինաս կրօնաւորը: Ինչպէս նախորդ ձեռագրում, այստեղ եւս Խաչատուրը յիշում է իր աշակերտին՝ Ստեփանոսին. «ԶԽաչատուր գծող Սուրբ Աւետարանիս եւ զաշակերտն իմ զՍտեփաննոս յիշեցէք ի Քրիստոս»¹⁰: Խաչատուր արեղայից մեզ հասած բոլոր վեց ձեռագրերում էլ նշուած է գրչութեան վայրը՝ Կտուց անապատը:

Կտուց անապատից մեզ յայտնի յաջորդ գրիչը՝ Յովհաննէս արեղան է: Նրանից մեզ յայտնի է հինգ ձեռագիր: Սրանց բոլորի յիշատակարաններում էլ գրիչը նշում է իր ուսուցիչներին՝ Գրիգոր եւ Խաչատուր կրօնաւորներին: 1470 թ. եւ 1483 թ. ձեռագրերում յիշում է նաեւ իր ծնողներին՝ Մուրատին եւ Մարգարտին: Առա-

8 Յուցակ հայերէն ձեռագրաց վասպուրականի, կազմ.՝ Ե. Լալայեան, Թիֆլիս, 1915 (այսուհետև՝ ԼՅՎ), ձեռ. թիւ 197, էջ 469-476. Հայերէն ձեռագրերի յիշատակարաններ, ԺԵ դար, հտ. Բ, էջ 382-383 (այն ձեռագրերը, որոնց ներկայի գտնուելու վայրը չենք գտնում, անյայտ են մնացել):
9 ԼՅՎ, ձեռ. թիւ 200, էջ 485-492. Հայերէն ձեռագրերի յիշատակարաններ, ԺԵ դար, հտ. Գ, կազմ.՝ Լ. Խաչիկեան, Երեւան, 1967, էջ 12-13. Լ. Ոսկեան, Աջ. աշխ., Ա մաս, էջ 61:
10 Յուցակ հայերէն ձեռագրաց Նոր Զուղայի Ամենափրկիչ վանքի, կազմ.՝ Սմբատ Տէր-Աւետիսեան, Վիեննա, 1970 (այսուհետև՝ Նոր Զուղա), ձեռ. թիւ 479, էջ 106-107, հմր. 71: Հայերէն ձեռագրերի յիշատակարաններ, ԺԵ դար, հտ. Գ, էջ 30:

ջին ձեռագիրը Աւետարան է՝ գրուած 1470 թ. (կորած)¹¹: Յաջորդ ձեռագիրը 1472 թ. ընդօրինակուած Աւետարանն է (Նոր Զուղա 476)¹², ծաղկողը՝ Աղթամարի վանքի միաբան եւ Մինաս ծաղկողի աշակերտ Կարապետն է. «ԶԿարապետ նկարողս յիշեցէք ի Քրիստոս եւ Աստուած զձեզ»: Յիշատակում է նաեւ Նիգարին «որ զգրոց թերձան մանեց»:

Յովհաննէս գրչի յաջորդ ձեռագիրը Տօնականն է (Ճառընտիր, ՄՄ 4869)՝ գրուած 10 տարի յետոյ՝ 1482 թ.: Վանքի՝ Ստեփանոս կրօնաւորի կողմից վերանորոգուելու մասին արդէն գիտենք Խաչատուր գրչի 1462 թ. գրուած ձեռագրից: Յովհաննէս գրիչն իր այս ձեռագրում 20 տարի անց եւս յիշատակում է անապատի Համար կարեւոր այս իրադարձութիւնը, նշում նաեւ իր կրօնաւոր եղբայրների անունները. «...տէր Գրիգոր եպիսկոպոսն, եւ զՍարգիս եպիսկոպոսն, եւ զՍտեփանոս վարպետն իմ, եւ զՅակոբ կրօնաւորն, եւ զՀայրապետ եպիսկոպոսն, եւ զՆերսէս կրօնաւորն, եւ զՎոքեր Խաչատուր կրօնաւորն՝ զՀայրապետ վանացս, եւ զՍտեփանոս բարունապետն՝ զնորոգող սուրբ եկեղեցոյս սուրբ Կարապետի, եւ զՄինաս ծաղկող սուրբ գրոցս, որ զարդարեալ պայծառացոյց, եւ զԿարապետ եկեղեցական կրօնաւորն, եւ զայլ միեղէն եղբարքն առհասարակ՝ զմեծ եւ զփոքրն՝ զասակից եւ մասնակից... Այլ եւ յիշեցէք զվարպետն իմ զԳրիգոր, որ զսակաւ գիրս ուսոյց մեզ»¹³:

11 Ձեռագիրը չի պահպանուել, յիշատակարանը տե՛ս ՄՄ ձեռ. թիւ 4515 (Ղեւոնդ Փիրղալեմեան, Նշխարք պատմութեան հայոց, գրուած 1884 թ. վանում). Հայերէն ձեռագրերի յիշատակարաններ, ԺԵ դար, հտ. Բ, էջ 300-301:
12 Նոր Զուղա, ձեռ. թիւ 476, էջ 94-96, հմր. 62 (թերթ՝ 379, թուղթ, 17.6x13, երկսիւն, բոլորգիր: Մանրակար. տէրմական՝ 21, անտարանիչք՝ 4, խորան՝ 10, կիսախորան՝ 4, լուսանցազարդեր եւ զարդարեր):
13 Հայերէն ձեռագրերի յիշատակարաններ, ԺԵ դար, հտ. Գ, էջ 29-30:

Չորրորդ ձեռագիրը 1483 թ. գրուած Աւետարանն է, որի ծաղկողը Մինասն է (ՄՄ 6879): Այստեղ գրիչը յիշատակում է մենաստանի եպիսկոպոսներին, կրօնաւորներին եւ միաբանակից միւս եղբայրներին. «զԳրիգոր եպիսկոպոսն, եւ զՍարգիս եպիսկոպոսն, եւ զմեծ զԽաչատուր կրօնաւորն՝ զվարպետն իմ, եւ զԳրիգոր վարպետն իմ, եւ զՅակոբ կրօնաւորն, եւ զՍտեփանոս կրօնաւորն, եւ զԽաչատուր խէրպետն, զՆերսէս կրօնաւորն, եւ զԿարապետ եկեղեցականն, եւ զՄինաս ծաղկողն եւ զայլ քահանայս եւ զմիաբան ուխտիս՝ զմեծ եւ զփոքր առհասարակ...»: Դառնացած գրիչը թողել է պատմական իրողութիւնների մասին տուեալներ. «Եւ արդ, գրեցաւ սա ի դառն եւ ի նեղ ժամանակիս, զի վասն ծովացէալ մեղաց իմոց Երզնկա քաղաք տապալեցաւ, եւ ԺԸՌ (18000) ոգի ի ներքեւ հողու մնաց, եւ այլ ոչ մնաց մի կենդանի: Եւ տաճկունք քանդեցին զսքանչելագործն: Բայց յայս ուրախ եմք, զի կրակ անգաւ յերկնից եւ էրեց զքաբայն՝ ԺԲ (12) մընիւրայ ի հետ եւ վեց հազար ոգի»: Ինչպէս նախորդ, այնպէս էլ այս ձեռագրում գրիչը բաւականին մանրակրկիտ նշում է գրչութեան վայրը, ժամանակը եւ այլ իրադարձութիւններ. «Յաստուածաբնակ Սուրբ Ուխտս, որ կոչի Կտուց, ընդ հովանեալ Սուրբ Աստուածածնիս, եւ Սուրբ Խաչիս, եւ Սուրբ Կարապետիս, եւ Սուրբ Ստեփանոսիս, եւ այլ ամենայն սրբոցս, որ աստ կան հաւաքեալ, ձեռամբ մեզսաներկ Յոհանիս...»¹⁴:

Յովհաննէս գրչից մեզ հասած հինգերորդ ձեռագիրը Մաշտոց է (ՄՄ 4087): Ստացողը Ասպահանչին է: Յիշատակարանի եղծուած լինելու պատճառով անյայտ է մնացել գրչութեան թուականը: Փորձենք ճշտել այն: Շատ կարեւոր է, որ այս ձեռագիրը մեզ յուշում է Աղթամարի կաթողի-

14 Հայերէն ձեռագրերի յիշատակարաններ, ԺԵ դար, հտ. Գ, էջ 39-40:

կոսի՝ տէր Ստեփաննոսի եւ Կտուցի վանքի առաջնորդի՝ Խաչատուր Հայրապետի անունները: Յայտնի է, որ Ստեփաննոս Գ. Տղան Աղթամարում կաթողիկոս է եղել 1465-1489 թթ.: Սակայն 1483 թ., ինչպէս յայտնի է Յովհաննէս գրչի այս թուականին ընդօրինակուած գրչագրից, Կտուցի առաջնորդը դեռեւս Գրիգոր եպիսկոպոսն էր. Խաչատուր Հայրապետը յաջորդել է նրան: Ուստի այս ձեռագիրը պէտք է գրուած լինի 1483-1489 թթ. Միջակայքում:

Կտուց անապատից մեզ յայտնի յաջորդ գրիչը Մինաս կրօնաւորն է: 1484 թ. Մինաս կրօնաւորը Ազբեկի եւ նրա կնոջ՝ Հաթունմելեքի խնդրանքով ընդօրինակում է Մաշտոց ծիսամատեան (ՄՄ 4966): Մէկ Մաշտոց էլ մեզ հասել է Բարսեղ կրօնաւորից¹⁵: Ձեռագիրը յետագայում պահուել է Վան քաղաքում, իսկ այժմ կորած է:

ԺԶ. դ. երկիրը տուժում է Օսմանեան Թուրքիայի եւ Սեֆեան Իրանի միջեւ սկսուած պատերազմի հետեւանքով: Այս դարում, կարելի է ասել, որ թէ՛ Լիմ, թէ՛ Կտուց անապատները եւ առհասարակ վանական կեանքը, դրա հետ կապուած նաեւ՝ գիտական եւ մշակութայինը, անկում են ապրում: ԺԶ. դ. Կտուցում գրուած որեւէ ձեռագիր մեզ յայտնի չէ:

ԺԷ. դ. գրուած վաղագոյն ձեռագիրը 1604 թ. Աւետարանն է՝ ընդօրինակուած Կարապետ եւ Սահակ գրիչների կողմից խօջա Սպանդիարի պատուէրով (ՄՄ 4838): 1621 թ. Պօղոսը Կտուցում ընդօրինակում է Ներսէս Մեծի Պատմութիւնը (կորած, Մուշ 70)¹⁶:

15 Ձեռագիրը չի պահպանուել, յիշատակարանը տե՛ս ՄՄ, ձեռ. թիւ 6273 (Ղեկոնդ Փիրղալեմեան, Նշխարք պատմութեան հայոց, հտ. Ա, գրում 1868-69 թթ.): Հայերէն ձեռագրերի յիշատակարաններ, ԺԵ դար, հտ. Գ, էջ 101:

16 Ս. Մուրատեան, Ն. Մարտիրոսեան, Յուցակ ձեռագրաց Մշոյ Ս. Առաքելոց-Թարգմանչաց վանքի եւ շրջակայից, Երուսաղէմ, 1967, ձեռ. թիւ 70, էջ 63-66:

Մենաստանում վանական կեանքը, դրա հետ կապուած նաեւ՝ գիտական եւ մշակութային գործունէութիւնը աշխուժանում են ԺԷ. դարի 20-ական թուականներից յետոյ, երբ Ներսէս վարդապետ Մոկացու վանքերի բարենորոգումի շարժումը Լիմից Կտուց անապատ է հասնում՝ նրա յաջորդի՝ Ստեփաննոս Շատախեցու օրօք: Լիմ անապատի միաբանները շատանում են, եւ նրանց մի մասը տեղափոխուում են Կտուց՝ միանալով Կտուցի սակաւաթիւ ճգնաւորներին:

1646 թ. Ղուկաս կրօնաւորը Կտուցում ընդօրինակում է Աղօթամատոյց (ՄՄ 6989): Գրիչը, ինչպէս հարկն է, կարեւորել է գաղափար օրինակի լաւ ընտրութիւնը. «Աղօթամատուց ի լաւ եւ յընտիր աւրինակէ, այլ եւ սակաւ ինչ ժողովեալ աստի եւ անտի եղաք ընդ սմա, որ է Նարեկացի եւ Աւետարան եւ սակաւ ինչ քարոզ եւ քերական, եւ ժամակարգութեան խրատք եւ այլ սոյնպիսիք, եւ եղաք ի մի տուք»¹⁷:

1655 թ. Դաւիթ գրիչը ընդօրինակում է Աստուածաշունչ (Եղմ. 2601):

1654 թ. եւ 1675 թթ. Կտուց է այցելում Յովհաննէս Շոռոթեցին: Յովհաննէս վարդապետ Շոռոթեցին Նախիջևանի Երնջակ գաւառի Շոռոթ գիւղաքաղաքից, Վարդան քահանայի որդին, Հայոց Փիլիպպոս կաթողիկոսի հրամանով 1652 թ. գնում է Երուսաղէմ: Այստեղ նա ժողովրդին ուսուցանելու եւ խրատելու համար կարիք է ունենում մի լաւ եւ ընտիր քարոզգրքի: Ուստի ետ է վերադառնում Հայաստան եւ սկսում շրջագայել տարբեր վայրերում՝ քարոզներ ընդօրինակելու համար: Ձեռագրի ընդօրինակումը (ՄՄ 2111) սկսում է իր հայրենի երկիր Շոռոթի Սբ. Գրիգոր Լուսաւորիչ վանքում, ապա այնտեղից գնում Կտուց անապատը, ուր պահուող մի հնագոյն Քա-

17 Հայերէն ձեռագրերի յիշատակարաններ, ԺԷ դար, կազմ. Վ. Յակոբեան, հտ. Գ, Երեւան, 1984, էջ 218:

րոզգրքից ընդօրինակում է ճառեր: Նրան աշխատակցում է Առաքել քահանայ Վանեցին: Կտուց անապատից յետոյ գրիչը շարունակել է իր աշխատանքը նաեւ այլ վայրերում:

1661 թ. Սարգիս գրիչն ընդօրինակում է Ներսէս Համբրոնացու «Առակաց Մեկնութիւն»-ը. ձեռագրի ստացողը վանքի առաջնորդ Մարտիրոսն է (ՄՄ 4994): Կտուցի միաբան Ղազար աբղ. Արղնեցուց մեզ յայտնի է երկու ձեռագիր. առաջինը Գր. Նարեկացու Աղօթագիրքն է (ՄՄ 4989, 1681 թ.), երկրորդը Ժողովածոյ է (ՄՄ 5624, 1683 թ.), որը բովանդակում է տարբեր հայրերի գրած աղօթքներ, Հաւատքի դաւանութիւն, տաղեր, դեղագրեր եւ այլ մանր նիւթեր:

Հայրապետ դպիր Մահմուտանցուց մեզ հասել է չորս ձեռագիր՝ առաջինը Սաղմոսաց մեկնութիւն է՝ ընդօրինակուած 1691/2 թ. (ՄՄ 4694), երկրորդը՝ Ժողովածոյ (ՄՄ 5087), երրորդը՝ Աստուածաշունչ (ՄՄ 6753 թ.), որը գրիչը մասամբ գրել է Լիմում: 1687 թ. գրիչն ընդօրինակում է Ժողովածոյ (Եղմ. 2332) Նիկողայոս վարդապետի խնդրանքով. «Քրիստոս Աստուած ողորմեա ստացողի գրոց»՝ Նիկողայոս վարդապետին եւ ծնօղաց նորին. ամէն: Գրեցաւ ձեռամբ Հայրապետի, ի դուռն Կտուց Սբ. Անապատի, ՌՃԼԶ թուականին. ամէն»: Այս ձեռագիրը յետագայում փոխադրուել է Լիմ անապատ: Հայրապետ գրիչը նաեւ կազմարար է: 1687 թ. Կտուցում Հայրապետ երէցը կազմում է մի Աւետարան՝ ոմն Թումա քահանայի խնդրանքով (ՄՄ 4666): Հայրապետ գրչի կազմած ձեռագրերից է ԺԷ. դ. Աղթամարում գրուած Աւետարանը (ՄՄ 5519), որը նա վերակազմել է 1701 թ.:

1686 թ. Փիլիպպոսը եւ Գէորգ Բիւզանդացին ստացողներն են Կտուցում ընդօրինակուած Ժողովածոյի (ՄՄ 8391): Ձեռագրի գրիչներն են Կարապետը, Յակոբ

երէցը, Գրիգորիկը: Ձեռագիրը պարունակում է դաւանաբանական նիւթեր, մեկնութիւններ, աղօթքներ: Թէեւ ձեռագրում գրչութեան որեւէ թուական նշուած չէ, սակայն ստացողների թուականից՝ 1686-ից, կարելի է դատել, որ այն գրուել է այս թուականից փոքր-ինչ շուտ:

ԺԷ. դարավերջին է գործել Մարտիրոս Համթեցի գրիչը: Նրա ընդօրինակութեամբ մեզ է հասել 3 ձեռագիր: Առաջինը Քարոզգիրք է եւ գրուել է 1696 թ. (ՄՄ 1844)¹⁸:

1696-1708 թթ. Մարտիրոս Համթեցին գրում է Ժողովածոյ (ՄՄ 2191): Ձեռագիրը սկսում է գրել Կտուց անապատում, ապա շարունակում Ամիրդոլու վանքում, Երուսաղէմում (Բարձրահայեաց Սբ. Աստուածածին) եւ Ախթալ վանքում¹⁹: Վերջին յիշատակարանում (1707 թ.), գրիչը նշում է նաեւ ձեռագրի ստացողին՝ «192բ/ի վայելումն յԵրուսաղեմացի Սիմէօն վարդապետի»: 1697 թ. Մարտիրոս գրիչը ընդօրինակում է եւս մէկ Ժողովածոյ (Վնտ. 22, հմբ. 1238):

Անթուակիր է ԺԷ. դ. Վարդան դպիրը ընդօրինակած աղօթագիրքը (ՄՄ 3471):

1711 թ. Յակոբ Բաղիշեցին ընդօրինակում է Հայելի վարուց (ՄՄ 4706), 1726 թ. Գրիգորը՝ Գր. Տաթեւացու Քարոզգիրքը (ՄՄ 8053), 1733 թ. Կարապետ Բաղիշեցին՝ Գր. Տաթեւացու «Յաղագս Գաւազան տալոյ» երկը (ՄՄ 5721): 1741 թ. Կտուցում ընդօրինակում է Աղօթագիրք. սրա առաջին ստացողը Մահմեթի Գրիգորն է, երկրորդը՝ Մելքոն վարդապետը (1802 թ.): 1753 թ. վանքում ընդօրինակում է Քարոզգիրք (Վիեն. 1527):

18 Ձեռագիրը մէկ կազմի մէջ է ԺԸ. դ. Ամիրդոլու վանքում Յակոբ Բաղիշեցու ձեռքով գրուած ձեռագրի հետ:

19 Ձեռագիրը մէկ կազմի մէջ է 1687 թ. Մատիւն քաղաքի Սբ. Յովհաննէս վանքում Իգնատիոս սարկաւազի ձեռքով գրուած ժողովածոյի հետ:

Սակաւաթիւ են նաեւ ժԹ. դարում ընդօրինակուած ձեռագրերը: 1801 թ. եւ 1826 թ. Յովհաննէս Պոլսեցին ընդօրինակում է Պետրոս Բերթումեանի Քարոզգիրքը (ՄՄ 6576), 1853 թ. Յարութիւն Թիֆլիսցին՝ Ժողովածոյ (ՄՄ 5357): 1848/9 թթ. մխիթարեան Հայրերից Ներսէս վրդ. Սարգիսեանը, այցելելով Լիմ եւ Կտուց անապատները, ընդօրինակում է Սարգիս Կունդի Աւետարանական մեկնութիւնները՝ «Մեկնութիւն Ղուկասու եւ Յովհաննու» (Վնտ. 687 /Հմր. 1350), Յովհան Ոսկեբերանի երկերը (Վնտ. 687 /Հմր. 1350) եւ Եկեղեցու Հայրերի գրուածքներից այլ ընտիր երկեր՝ «Հաւաքումն բանից նախնեաց» խորագրով (Վնտ. 678 /Հմր. 305)²⁰:

²⁰ Մայր Յուցակ հայերէն ձեռագրաց Մատենադարանին Մխիթարեանց ի վեցետիկ, հտ. Է, կազմ. Ս. Շենգելեան, 1996 թ., ձեռ. թիւ 687, հմր. 1350, էջ 667-674 (թերթ՝ 346, թուղթ, 23x36, միասին, շղագիր):

Կտուցի Սբ. Կարապետ վանքը, ինչպէս նաեւ Վանայ լճի միւս կղզիների՝ Աղթամարի եւ Լիմի վանքերը, եղել են թէ՛ ձեռագրաստեղծման, թէ՛ ձեռագրապահպանման խոշոր կենտրոններ: Անշուշտ, Կտուցում, ինչպէս նաեւ Հայկական գրչութեան այլ կենտրոններում ստեղծուել են աւելի մեծ քանակով ձեռագրեր. սրանց մի մասը կորել, ոչնչացուել են տարաբնոյթ աղէտների ու պատերազմների հետեւանքով: Զգալի թիւ են կազմում 1915 թ. եղեռնալից օրերին կորած ձեռագրերը: Թէեւ Կտուցից մեզ հասած ձեռագրական ժառանգութիւնն աւելի քիչ է, քան Աղթամարինը եւ Լիմինը, այնուամենայնիւ, այդ ձեռագրերը մեր մշակութային անգին եւ անգնահատելի գանձերն են:

ԳԻՐՔԸ ԹՈՒՄԱՆԵԱՆԻ ԿԵԱՆՔՈՒՄ

Սուսանա Յովհաննիսեան

Թումանեանը Հայ ամենաընթերցասէր գրողներից է, գրքի, գրականութեան եւ հրապարակագրութեան վրայ մեծ ազդեցութիւն թողած հեղինակ: Եթէ Մ. Լերմոնտովը չաւարտեց Մոսկուայի Համալսարանը, Լ. Տոլստոյը՝ Կազանինը, ապա Թումանեանը չաւարտեց նոյնիսկ Ներսիսեան դպրոցը: Ուսումնառութիւնը կիսատ թողած բանաստեղծը հէնց գրքի շնորհիւ, գիտական ու գեղարուեստական ընթերցանութեամբ ընդլայնեց իր մտահորիզոնը, դարձաւ Բրիւսովի խօսքերով՝ «ինքնակիրթ» եւ մեր ազգային մշակոյթի պատմութեան մէջ մտաւ իբրեւ հրապարակախօս, քննադատ, գիտնական ու, թէեւ անաւարտ, սակայն պատմաբանասիրական ուսումնասիրութիւնների, քաղաքակրթութեան ու մշակութաբանութեան, Հայ գրականութեան եւ ազգային պատմութեան համար արժէքաւոր ծրագրային հիմնարար յօդուածների հեղինակ: Գրողի աշխատութիւնները, նոյնիսկ բանաւոր զրոյցներն ու նամակները վկայում են բազմակողմանի զարգացած մարդու լայն մտահորիզոնի մասին:

Գրքի նկատմամբ Թումանեանի սէրը վիթխարի էր. ապացոյցն իր կեանքի օրօք 10 000 միւսեր գրականութիւն կազմող գրադարանն էր: Այսօր պահպանուել եւ գրողի թանգարանում պահուում է շուրջ 8000 գիրք: Անհետ կորած մօտ 2000 գրքերի զգալի մասը ժամանակին բռնագրաւուել է ոստիկանների կողմից նրան ձերբակալելիս, մի մասը ինքն է նուիրել եւ չի կարողացել նոր օրինակ գտնել, մի որոշ մասն էլ չի պահպանուել տարբեր պատճառներով: Երբ Թումանեանը դուրս եկաւ Հայրական տնից, իր հետ քաղաք էր բերել

մէկ գիրք՝ Խաչ. Աբովեանի «Վէրք Հայաստանին» եւ «Հիւսիսափայլ» ամսագրի մէկ համար: Գրողն ինքը խոստովանում է. «18 տարեկան էի դարձել եւ միայն մի քանի գիրք էր անցել ձեռքս, էն էլ մեծ մասամբ պատահմունքով»¹: Եւ ընդամէնը երեք տասնամեակում, ազգային-հասարակական հոգսերով գերծանրաբեռնուած կեանքի ընթացքում նա ձեռք բերեց մեծ ու արժէքաւոր գրադարան: Համեմատութեան համար ասենք, որ Լ. Տոլստոյի Եասնայա Պոլեանայում պահուում է շուրջ 16.000 գիրք, որ ձեռք է բերել ապահովուած Տոլստոյների ազնուական տոհմի մի քանի սերունդ, իսկ Թումանեանը միայնակ կազմեց իր գրադարանը: Այն սիրով, յատուկ խնամքով եւ ընտրութեամբ ձեռք բերուած կովկասագիտական, Հայագիտական, արուեստաբանական, պատմագիտական, փիլիսոփայական եւ այլ բնագաւառների գրքերի հարուստ հաւաքածոյ՝ է տարբեր լեզուներով:

Բանաստեղծի գրադարանը արժէքաւոր է մի շարք առումներով: Գրքերի ընտրութիւնը վկայում է ընթերցող Թումանեանի ճաշակի, նախասիրութիւնների, հետաքրքրութիւնների լայն շրջանակի մասին: Այստեղ կարելի է հանդիպել հին աշխարհին, մարդու ծագումնաբանութեանը, աստուածաշնչեան մարգարէութիւնների պատմութեանը, Յովհաննու Յայտնութեանը վերաբերող ուսումնասիրութիւններին², աշխար-

¹ Յովհաննէս Թումանեան, Երկերի լիակատար ժողովածու տասը հատորով,- ՀՀ ԳԱԱ «Գիտութիւն» հրատ., (Թումանեան, ԵԼԺ) հտ. 7, Երեւան, 1995, էջ 226: Այսուհետեւ՝ ԵԼԺ, հատորն ու էջը կը նշուեն տեքստում:
² Տե՛ս Գ. Մորտիլե, А. Մորտիլе, Дюсторическая жизнь: Происхождение и древность человека, пер. с французского, СПб., 1903, 575